

«Եվ եթե իմ ժողովուրդը, որի վրա իմ անունն է դրված, խոնարհվի, աղոթի, իմ երեսը փնտրի ու ետ դառնա իր չար ճանապարհներից, այն ժամանակ ես երկնքից կլսեմ, կներեմ նրա մեղքը և կրժշկեմ նրա երկիրը»:

Բ ՄԱՅՈՐԴԱՅ 7:14

Միբելի Հայրենակիցներ,

Նախքան ելույթիս անցնելը, Ձեզ եմ փոխանցում Արցախում ապրող մեր քույրերի և եղբայրների ջերմագին ողջույններն ու անմնացորդ սերը:

Բոլորս էլ քաջատեղյակ ենք, թե ինչ է կատարվում Արցախում և ինչ խմորումներ են տեղի ունենում մեր հայրենիքի այդ սրբազան մասունքի շուրջ: Ինչպես ժամանակին Խրիմյան Հայրիկն էր բնութագրում Հայկական Հարցը, Ճիշտ նույն իրավիճակում ենք այսօր գտնվում մենք: Մի մեծ առևտուր է ընթանում. Արցախը դրված է վաճառքի, իսկ երկաթե շերեփավորները ախորժակները սրած սպասում են իրենց պատառին:

Որքան էլ խաղաղության սին հույսերի գինով հարբենք ու փորձենք մենք մեզ խաբել, դրանից իրականությունը չի փոխվի և ինչպես խրոնիկ հարբեցողի դեպքում է լինում, ամեն ինչ գնալու է դեպի կործանում:

Արցախը ենթակա չէ՛ վաճառքի, Արցախը Աստվածապարզն հայկական աշխարհի անբաժան մասն է, Արցախը սրբություն է, հող է, պատմություն է, և այն պատկանում է միայն ու միայն մեզ՝ հայերիս: Այսօր կանգնե՛լ Արցախի կողքին, կնշանակի կանգնել մեր խղճի ու արդարության կողքին, կանգնե՛լ Արցախի կողքին, կնշանակի կանգնել քաղաքակրթության և մարդու իրավունքների կողքին, կանգնել՝ Արցախի կողքին, կնշանակի հավատարիմ մնալ Աստծո պատգամներին: Աստված Սեր է, և այդ սիրո վրա հիմնված եղբայրությունն ու հայրենասիրությունն է դառնալու մեզ այնքան անհրաժեշտ *Երկաթե շերեփը:*

Բնականաբար մարդիկ և ազգերը ժամանակ առ ժամանակ հնձում են այն, ինչը սերմանել են ու աճեցրել, բայց այսօր մեր բոլոր գործած մեղքերից ավելի վախեցնողն ու սարսափելին անտարբերության 8-րդ մահացու մեղքն է: Եթե մենք կրավորական դիրքով ու անտարբերությամբ ենք հետևում վերը նշված գործընթացներին, նշանակում է գործակից ենք դառնում Արցախը վաճառողներին:

Ներողությունն էմ խնդրում համեմատության համար, բայց *Միթե՞ անհրաժեշտ է երթուղային տրանսպորտի կամ էլեկտրաէներգիայի վճարները 50 դրամով թանկացնել, որպեսզի 100,000-ավոր հայեր դուրս գան փողոցներ ու արդարություն գոռան: Միթե՞ հայի գրպանին դիպչելն ավելի ծանր հանցնաք է, քան հազարամյա հայրենիքը մաս-մաս վերցնելը: Միթե՞ սա է Հայր....*

Օրեր առաջ Մարտակերտի շրջանի գյուղերից մեկում երկու մանկահասակ երեխաներ խեղդամահ եղան՝ իրենց համար ուտելիք փնտրելու նպատակով ոտքով շրջկենտրոն գնացած մայրիկին փնտրելու ճանապարհին, արդեն գրանցվել են հղիների թերսնուցման պատճառով չծնված երեխաների վաղաժամ մահվան դեպքեր, տրանսպորտի և դեղորայքի բացակայության պատճառով բազմաթիվ հիվանդներ՝ հատկապես նրանք, ում կյանքը կախված է արյան պարբերական դիալիզից, բառացիորեն սպասում են, թե երբ պիտի մահանան: Է՛լ ինչ է պետք, որպեսզի հասկանանք իրավիճակի լրջությունը, որպեսզի մեր սրտերը ճմլվեն և գիտակցենք, որ սա մեր ընդհանուր ցավն է և որ մենք անելիք ունենք:

Այօրվա իրականությունը գալիս է ևս մեկ անգամ մեզ հիշեցնելու, որ Արցախյան շարժումը չի ավարտվել և դեռ շարունակվում է: Այն մեզ համար պիտի դառնա հանապազօրյա հացի պես, դառնա ապրելակերպ, առաքելություն, գաղափար և գործ:

Արցախյան շարժման ընթացքին հազարավոր հայորդիներ հերոսացան, անմահացան և դարձան հզոր հոգևոր բանակ, որոնց հոգևոր հայացքի ներքո մենք չպիտի սխալվենք, այլ ամբողջ ազգով դառնալով մեկ միասնական բռունցք՝ այդ շարժումը հասցնենք իր բարի ավարտին՝ ազատ, ինքնիշխան և անվտանգ Արցախի կերտմանը: Այսօր Արցախն է Հայի ինքնության և արժանապատվության շարժիչ ուժը: Կորցնելով Արցախը, կորցնելու ենք մեր ինքնությունն ու արժանապատվությունը:

Սիրելի Արցախցիներ, Ձեզ ենք փոխանցում նաև Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի հայրական սերն ու աղոթքը, և վերստին հիշեցնում, որ Հայաստանյայց Առաքելական մեր Մայր Եկեղեցին՝ աշխարհասփյուռ իր թեմերով կանգնած է Ձեր արդար պայքարի կողքին և շարունակելու է ամեն ջանք գործադրել՝ ազգային մեր երազանքի իրագործման համար:

Միրելի հայրենակիցներ, ի Հայաստան, յԱրցախ և ի սփյուռու աշխարհի, թոթափենք՝ մեզանից անտարբերության կործանարար չարիքը, ոտքի՛ ելնենք ազգովի և կանգնենք Արցախի կողքին: Օրհնյալ է մեր ուղին, որովհետև Աստված մեզ հետ է, և եթե Աստված մեզ հետ է, ո՞վ կարող է լինել մեզ հակառակ:

(Եվ հիմա, որպես համազգային միասնության վերանորոգման մի նոր մեկնարկ, միասնաբար խոնարհվենք և մեր աղոթքով Աստծուց ողորմություն և պահպանություն խնդրենք հայոց ազգի և Արցախ աշխարհի համար...)